

आकाशवाणी जयपुर-अजमेर
प्रादेशिक समाचार
दिनांक 05.02.2025 समय: 18.45 बजे

- प्रदेश मांय कुछ जिला अर संभाग निरस्त करण रा मुद्दा माथे विधानसभा मांय हंगामो- ई मुद्दा माथे काल चर्चा व्हेला।
- पाणी बचावण री जाग जगावण सारू जलग्रहण यात्रा सुरू व्ही-राज्य मांय बारां जिला ऊं सुरू व्ही यात्रा 110 उपखंडां ऊं निकलेला।
- प्रदेश मांय आज सुरू व्ही एग्रीस्टैक योजना रा तैत फार्मर रजिस्ट्री शिविर लगायी ज्या।
- राज्य मांय आवता दो दिन मांय पारो दो ऊं तीन डिग्री सेल्सियस ताई उतरण रा आसार।

000

प्रदेश मांय जिला अर संभाग निरस्त करण रा मुद्दा माथे स्थगन प्रस्ताव रा बारा मांय आज विधानसभा मांय हंगामो व्ह्यो। विपक्ष रा सदस्यां रा शोर-शराबा ने ध्यान राखता थकां स्पीकर वासुदेव देवनानी सदन री कार्यवाही 15 मिनट सारू टाळ दीनी। कार्यवाही ओजू सुरू व्हेवण परां ई विपक्ष रा सदस्यां रो हंगामो चालतो रह्यो। बाद मांय श्री देवनानी कह्यो के विपक्ष रा सदस्य काल ओ मामलो उठा सकेला। ई पाछे सदन मांय मंत्री जवाब देवेला। सरकारी मुख्य सचेतक जोगेश्वर गर्ग खबरनवीसां सामी कह्यो के पैली वाळी गहलोत सरकार बिना तैयारी नुवा जिला बणावण रो ऐलाण कर दीनो हो, जदके मौजूदा राज्य सरकार सोच-समझ र वां ने निरस्त कीना है।

एसबी-जोगेश्वर गर्ग

000

ऊर्जा मंत्री हीरालाल नागर आज विधानसभा मांय भरोसो दिरायो के प्रदेश मांय पीएम कुसुम योजना ने बधावो दे र आवता दो साल मांय किसानां ने खेती सारू दिन मांय बिजली मुहैया कराई जावेला। प्रश्नकाल मांय सदस्यां रा पूरक सवालां रा जवाब मांय नागर कह्यो के राज्य मांय 33 केवी रा ज्यां सब स्टेशनां माथे पीएम कुसुम योजना रा तैत सूरज री रोशनी ऊं बिजली बणावण री मशीनां लगा दीरीजी है, वां ऊं जुड़या 11 केवी फीडरां ऊं खेती-बाड़ी सारू सामान्य श्रेणी रा कनेक्शन देवण माथे खास ध्यान दियो जावेला। श्री नागर बतायो के जयपुर, जोधपुर अर अजमेर विद्युत् वितरण निगम मांय 17 हजार 155 मेगावाट बूता रा 6 हजार 560 सोलर पावर प्लांट्स लगावण सारू ठोडां री पिछाण कर लीरीजी है।

000

केन्द्रीय ग्रामीण विकास मंत्री शिवराज सिंह चौहान आज वीडियो कॉन्फ्रेंसिंग रे मार्फत जल लाए धन-धान्य थीम माथे आधारित वाटरशेड यात्रा री सुरूआत कीनी। ई मौके श्री चौहान सगळां ऊं पाणी अर मिट्टी बचावण री अरज कीनी। वे कह्यो के पानी अर मिट्टी बचावण बाबत आवता दो साल सारू जनभागीदारी होड़ चलायी ज्यी है। इण बेहतरीन काम करण वाळी परियोजनावां ने अतिरिक्त 20 लाख रुपया रो ईनाम दियो जावेला।

प्रधानमंत्री कृषि सिंचाई योजना 2.0 रा तैत प्रदेश मांय आज बारां जिला री किशनगंज ग्राम पंचायत ऊं जलग्रहण यात्रा सुरू व्ही। ई मौके श्रमदान, पौधा रोपण, कलश यात्रा अर पाणी बचावण री शपथ लेवण रा कार्यक्रम राख्यी ज्या। जिला कलेक्टर बतायो के रोहिताश्व तोमर बतायो के ई यात्रा रे मार्फत बिरखा रो पाणी भेलो करण, मिट्टी रो कटाव रोकण अर खेती-बाड़ी री उपज बधावण रो संदेश दियो जा रह्यो है।

एसबी रोहिताश्व तोमर

जलग्रहण यात्रा राज्य रा 110 ब्लॉक ऊं व्हेती निकळेला। ई यात्रा रा पहला गेला मांय राज्य रा 14 जिलां री 61 परियोजनावां अर दूजा गेला मांय 16 जिलां री 49 परियोजनावां शामिल है। ई रा तैत चारागाह विकास करण अर एनीकट अर चेकडैम बणावण सरीखा पाणी भेळो करण रा काम चाल रह्या है।

000

मुख्यमंत्री भजनलाल शर्मा कह्यो है के राज्य सरकार संकल्प पत्र मांय करी ज्या हर एक वायदा ने पूरो करण री कोशिश कर रही है। वे कह्यो के प्रदेश रा किसानां ने मुख्यमंत्री किसान सम्मान निधि रो फायदो दियो जा रह्यो है। मुख्यमंत्री आज जालौर जिला रा नरसाणा मांय राख्यी ज्या एक धार्मिक कार्यक्रम मांय बोल रह्या हा।

एसबी-मुख्यमंत्री-1

ई मौके मुख्यमंत्री कह्यो के मिन्दर लोगां री आस्था सागे सामाजिक अर सांस्कृतिक चेतना रा केन्द्र ई व्हे है।

एसबी-मुख्यमंत्री-2

000

प्रदेश मांय आज एग्रीस्टैक योजना सुरू करी ज्यी। ई रा तैत 31 मार्च तांई शिविर लगा र किसानां ने 11 अंक री खास फार्मर आई.डी. दी जावेला। ई रे मार्फत किसान सरकार री न्यारी-न्यारी योजनावां रो फायदो ले सकेला। ई सागे ई किसानां ने प्रधानमंत्री सूर्य घर योजना, मुख्यमंत्री आरोग्य आयुष्मान योजना, किसान क्रेडिट कार्ड, मंगला पशु बीमा योजना, पशु टीकाकरण अर ईलाज समेत न्यारी-न्यारी योजनावां रो फायदो मिल सकेला। डूंगरपुर मांय जिला कलेक्टर अंकित कुमार सिंह जेलाना अर कारोली पंचायत समितियां मांय लगायी ज्या शिविरां रो जायजो लीनो। बाड़मेर जिला री नेडी, नाड़ी, आलपुरा, चाड़ार अर तामलोर समेत न्यारी-न्यारी ग्राम पंचायतां मांय लगायी ज्या शिविरां मांय किसान उमाव सागे शिरकत कीनी।

000

70 सीटां वाळी दिल्ली विधानसभा रा चुनाव सारू आज वोट पड़्या। सिज्यां पांच बज्यां तांई 57 फीसदी ऊं बत्ता वोट पड़बा रा समाचार है। राष्ट्रपति द्रौपदी मुर्मू, उपराष्ट्रपति जगदीप धनखड़, सुप्रीम कोर्ट रा मुख्य न्यायाधीश संजीव खन्ना, केंद्रीय मंत्री डॉ. एस जयशंकर अर हरदीप सिंह पुरी, कांग्रेस रा आला नेता राहुल गांधी, सेना अध्यक्ष जनरल उपेंद्र द्विवेदी, दिल्ली रा उपराज्यपाल विनय कुमार सक्सेना अर दिल्ली री मुख्यमंत्री आतिशी समेत केई नामी लोग वोट दीना। दिल्ली विधानसभा चुनाव सारू छह सौ निन्यानवे उम्मीदवार मैदान मांय है। दिल्ली मांय एक करोड़ 56 लाख ऊं बत्ता पंजीकृत मतदाता है।

000

अर अब खबरां महाकुंभ ऊं-

एसटी महाकुंभ

प्रधानमंत्री नरेंद्र मोदी आज प्रयागराज रा त्रिवेणी संगम मांय पवित्र डुबकी लगाई। ई पाछे सोशल मीडिया पोस्ट रे जरिये वे कह्यो के संगम माथे नहावणो दिव्य जुड़ाव रो लम्हो हो। वे कह्यो के इण मांय सिरकत कर रह्या करोड़ों लोगां री भांत वे ई भक्ति-भाव ऊं भर गया है। श्री मोदी आस जतायी के मां गंगा देश री जनता ने शांति, ज्ञान, चोखा स्वास्थ्य अर भाईचारा रो आशीर्वाद देवेला।

केंद्रीय मंत्री किरन रिजिजू ई आज संवारे महाकुंभ रा तैत संगम मांय पवित्र डुबकी लगाई। वे सोशल मीडिया पोस्ट रे जरिये कह्यो के जातरूआं ने मेला प्राधिकरण रा दिशा-निर्देशां री पालना करणी चाहिजे। प्रदेश ऊं ई महाकुंभ मांय शिरकत करण सारू जावण वाळा जातरूआं सारू रोड़वेज अर रेल्वे री ओर ऊं खास व्यवस्थावां करी ज्यी है। आज शाम चार बज्यां जोधपुर कने भगत की कोठी रेल्वे स्टेशन ऊं मेला स्पेशल रेलगाड़ी रवाना व्ही, जदके जयपुर ऊं प्रयागराज सारू आज नुवी उड़ान सुरू व्ही।

दौसा मांय जयपुर-आगरा नेशनल हाईवे माथे बालाहेड़ी हलका रा पीपलखेड़ा गांव कने आज एक बस रे पलट जावण ऊं दो महिलावां री मौत व्हे गयी अर 14 जणां जखमी व्हे गया। आ बस महाकुंभ ऊं पाछी आ रही ही। जखमी लोगां ने महवा रा अस्पताल मांय भर्ती करायी ज्या है। एक और हादसा रे कारण जयपुर कने चौमू मांय जयपुर-बीकानेर हाईवे माथे एक स्कूल बस पुलिया ऊं पड़ जावण ऊं एक छात्रा री मौत व्हे गयी अर नौ बच्चा घणा जखमी व्हे गया। हादसा पाछे बस रो ड्राइवर मौका ऊं भाग गयो।

राज्य मांय पश्चिमी विक्षोभ रा असर ऊं व्ही हल्की बारिश रे कारण ओजू ठण्ड रो असर बध गयो है अर दिन री बगत पारो थोड़ो उतर्यो है। मौसम केन्द्र जयपुर रे मुजब उत्तरी हवा रा असर ऊं आवता दो दिन पारो दो ऊं तीन डिग्री सेल्सियस ताई और उतरण ऊं सुबह-शाम सर्दी बधवा री संभावना है। ई दौरान शेखावाटी हलका मांय कठे-कठे शीतलहर रा आसार है। आज सब ऊं कम 3 दशमलव 9 डिग्री सेल्सियस न्यूनतम तापमान सीकर जिला रा फतेहपुर मांय दर्ज करी ज्यो। हनुमानगढ़ जिला रा संगरिया मांय 4, नागौर मांय साढ़े 4 अर बीकानेर जिला रा लूणकरणसर मांय साढ़े 5 डिग्री सेल्सियस कम ती कम तापमान नापी ज्यो। सीकर, चित्तौडगढ़, करौली, दौसा, चूरू, जालौर, पिलानी अर डबोक मांय ई न्यूनतम तापमान 10 डिग्री सेल्सियस ऊं नीचे रह्यो। ई बीचे लारला चौबीस घंटा मांय प्रदेश मांय दिन री बगत तापमान 30 डिग्री सेल्सियस ऊं नीचे दर्ज करी ज्यो।